

Segun comerciante David Cybul

Humanidad no mester lubida hamas cu a existi un Holocaust

Estatua di Anne Frank na Aruba ta mantene na bida e recuerdo aki

ORANJESTAD

Diadomingo awor 12 di Juni lo ser de vela e estatua di Anne Frank den centro di Wilhelmina Park. E estatua aki crea pa e artista Hulandes, Joep Coppens, ta un simbolo pa promove tolerancia, solidaridad, libertad y igualdad di cada miembro di e comunidad Arubano.

E comerciante David Cybul ta aplaudi e iniciativa aki cu e gobierno actual hunto cu Fundacion Respeta Bida a realisa pa bin cu un estatua di Anne Frank na Aruba. Sr. Cybul kende ta di origen Hudi cu a bini for di Polonia pa establece nan mes den e region aki, ta consciente cu e memoria di ser humano ta algo fragil, y ta bon pa bin cu e tipo di estatua aki pa recorda un periodo tristo y scur di historia di nos humanidad yen di victimanan di diferente rasa y nacionalidad.

E ta bisa cu awendia tin hende cu ta tribo di bisa cu no a existi un holocaust durante II Guerra Mundial, mientras cu ta existi cifranan impactante di morto cu ta papia pa su mes. E ta bisa cu e cifra di victima a supera mas cu 72 miyon di hende; y cu e unico cu a ser afecta no tabata e pueblo Hudi so cu 6 miyon di victimanan, sino cu entre nan a muri 1.900 pader Catolico, ademas di e pueblo

- Gitano cu a ser sometí na un persecucion innecesario. Ademas di e sufrimentonan cu nan a pasa aden ora cu nan a ser marca manera bestia riba nan cuero; y afecta tur nan integridad fisico.

Tur esaki ta situacion cu sr. David Cybul por a sinti di cerca ora cu gran parti di su famia cu tabata biba na Polonia a ser victima di e Holocaust aki.

“Anto awendia ta ser prohibi di papia tocante e Holocaust incluyendo Inglatera, Francia, y tin un universidad na Kentucky cu ta cuestiona cu nunca a yega di existi un Holocaust”, asina masha indigna sr. Cybul ta declara durante un entrevista cu BON DIA Aruba. E ta recorda cu dia 1 di september di 1939, ora cu II Guerra Mundial a start, e tabata casualmente na Aruba. E tabatin apenas 11 año, pero na Polonia e tabatin omonan, primonan y demas famia cu a muri victima di e holocaust.

E ta haya cu humanidad no mester lubida hamas cu a existi un Holocaust, ya cu ta necesario pa mantene y conserva e balor di bida. Esaki ta -segun sr. Cybul- loke ta ser haci cu e instalacion di un estatua den conmemoracion di Anne Frank den cuadro di su fecha di cumpleaños. Si e tabata na bida ainda e lo celebra 82 año.

Pa sr. Cybul ta importante pa

mantene bibo e recuerdo cruel di loke a sosode cu e Holocaust durante II Guerra Mundial. Pesey el a uni su mes na e gran trabou di por a contribui pa e estatua di Anne Frank lo ser instala na Aruba diadomingo awor. “Mi ta sintimi masha satisfecho cu esaki, ya cu e mester ta asina...”, segun sr. David Cybul.

“Anto awendia ta ser prohibi di papia tocante e Holocaust incluyendo Inglatera, Francia, y tin un universidad na Kentucky cu ta cuestiona cu nunca a yega di existi un Holocaust”

E ta interpreta e presencia di estatua aki como un recordatorio di esnan cu a sufri durante e di II Guerra Mundial, sino dentro di poco añanan nos humanidad lo lubida e holocaust aki. Awor Aruba dor di e estatua aki lo tin un simbolo fisico real di Anne Frank, manera tin un na Costa Rica, asina e comerciante ta bisa.

Anne Frank tabata un mucha muhe Hudi cu a nace na Alemania. El a bira un simbolo inmortal di e holocaust ora cu el a skirbi den su diario personal conoci como “Diario di Anne Frank” loke e y esunnan cu



E comerciante David Cybul

tabata hunto cune a pasa aden durante casi dos año y mei cu nan a pasa scondi di e Nazinan na Amsterdam (Hulanda), durante II Guerra Mundial. Nan a ser descubri, y Anne a ser manda na un campo di concentracion prome na Auschwitz y despues na Bergen-Belsen unda el a muri di Tyfus.

E comerciante sr. David Cybul ta lamenta cu apesar di e holocaust aki cu a tuma luga durante II Guerra Mundial, y

cu a laga mas cu 72 miyon di victimanan, ainda ta tumando luga acontecimiento di racismo y violencia manera loke a sosode na ex-Yugoslavia entre Serbionan, Croatanan y Bosnionan; y tambe na Ruwanda entre Tutsi y Hutu; y loke recientemente ta sosodiendo na Lybia, y Turkya, unda hende muhe no tin niun derecho; y caminda hende homber tin e derechonan di maltrata e hendenan muhe. □